

La Quotidiana 2-12-2013, p. 8

34avel Top Pop Rumantsch – Made in China

■ (cp) Il 34avel Top Pop Rumantsch deriva da Lisa Dermont. Ella ha scrit en China in pitschen imni a la Surselva per surventscher l'encreschadetgna. Il Top Pop Rumantsch è vegnì preschentà per l'emprima giada venderdi passà, ils 29-11-2013 en l'actualitad da mezdi dal Radio Rumantsch.

Il Top Pop numer 34 vegn da la China. Co quai? *Lisa Dermont*, studenta da sinologia, oriunda da Rueun, ha passentà trais semesters da stgomi a Beijing ed a Kunming. In bel di l'ha in'amia regalà in'ukulele. Ella, ch'aveva studegià chant classic durant il gimnasi a Cuira, ha sinaquai scuvert in'avaina ligera en sasezza. E damai ch'ella laschava encrescher per la Surselva ha Lisa cumenzà a scriver ina chanzun, plegond quella enturn ils emprims quatter accords emprendids. Ina chanzun che celebrescha las quatter stagions e la bellezza da la cuntrada alpina. Agiuntond cun il temp anc autras atgnas chanzuns – perfin da quelas chinaisas – ha Lisa Dermont sviluppà in program concertant ch'ella ha lura preschentà tar differentas occasiuns – en bars, tar nozzas, sin festivals da strada – per il giardi dal public chinais. Turnada en patria ha Lisa proponì la chanzun «Surselva» al team dal Top Pop. Producent *Manfred Zazzi* e ses musicists han mantegnì la tempra oriunda e rinforzà l'aria da «global pop» à la *Manu Chao*. Ed uss avain nus il giardi cun questa frestga melodia che gira tras las undas dal Radio Rumantsch, schend «Ir sai jeu adina, mo lu è turnar!»

Top Pop Rumantsch è ina seria da produziuns da musica nova ed actuala, lantschada da RTR Radiotelevisiun Svizra Rumantscha l'onn 2005. Tut ils titels da la seria èn d'udir sin la pagina d'internet da RTR sut:

<http://www.rtr.ch/home/dossiers/actual/Top-Pop-Rumantsch.html>

Las emprimas 30 chanzuns èn er disponibilas sin ils disc cumpacts Top Pop Rumantsch vol. 1 & 2 ch'èn da retrair tar: RTR, Via Masans 2, 7002 Cuira.